

Qalam

Bilangan 78 *Jamādi al-Sānī* 1376 Januari 1957 60 sen

Fitnah-fitnah yang Merosakkan Hubungan

Beberapa buah surat khabar Indonesia yang kita baca telah mengutip satu berita yang diterbitkan oleh Harian "Peristiwa" di Aceh yang menyiarkan, kononnya, kampung-kampung Aceh dari Dar al-Islam yang termasuk di dalamnya Tuan Hasan Ali, Perdana Menteri negara Islam Indonesia Aceh telah datang ke Singapura pada 19 November yang lalu dan turun di perhentian Kapal Terbang Changi (tentera-P) dengan berpakaian uniform tentera dan disambut oleh pegawai-pegawai tentera di sini. Berita-berita itu adalah bersifat sebagai suatu berita yang membawa suatu aliran menjatuhkan bahwa pemerintah negeri ini ada bercampur tangan dengan orang-orang negara Islam Indonesia di Aceh dan kesan-kesan berita itu apabila tersiar merebak ke seluruh Indonesia akan mudah menimbulkan perasaan-perasaan bahawa sememanya kerajaan Singapura dan Persekutuan Tanah Melayu menjadi tulang belakang kebangkitan-kebangkitan umat untuk menegakkan negara Islam di Aceh itu. Setelah kami menyiasat dan menyelidiki maka zahir berita-berita itu fitnah belaka dan tidak pula munasabah dengan keadaan yang sebenar. Tujuannya semata-mata untuk memburukkan kerajaan Singapura dan Persekutuan ini.

Kejadian ini mengingatkan kita tentang tersiarnya berita kedatangan Kolonel Hasan Saleh dan perkara itu

telah menjadi ribut dan menimbulkan tuduhan-tuduhan pula kepada kerajaan Singapura dan Persekutuan Tanah Melayu dan menimbulkan kesan-kesan sama seperti di atas sedang Kedutaan Indonesia di sini pula menafikan tentang benarnya ada pertalian mereka dengan Hasan Saleh serta menyatakan bahawa mereka tidak mengetahui langsung tentang kedatangan itu.

Kalau kedatangan kedua-dua berita yang tersebut dengan keadaan yang sebenarnya maka ini menimbulkan suatu syak apakah sememangnya di Tanah Melayu ini wakil-wakil kerajaan Indonesia itu menimbulkan perkara-perkara yang tidak digemari yang boleh menfitnahkan nama baik kerajaan Persekutuan dan Singapura dalam hal ini sedang di balik layar bahawa kedatangan pegawai-pegawai negara Islam Indonesia di Aceh itu dianjurkan oleh konsul untuk mengadakan perundingan-perundingan, untuk pendamaian di antara sesama mereka. Kami mendatangkan tuduhan dengan suatu asas apabila kami mendapat bukti yang nyata bahawa Panglima Agung Negara Islam di Aceh Kolonel Hasan Saleh tatkala tiba di Semenanjung ini turun dengan pakaian rasminya (uniform tentera) telah disambut oleh wakil kerajaan Indonesia (konsul) di Pulau Pinang dengan suatu cara yang rasmi yang gambarnya dihidang menjadi hiasan muka hadapan keluaran ini, yang dengan itu membuktikan bahawa di Malaya ini tempat mereka berunding dan sambil berunding tanah tempat mereka berunding itu diburuk-burukkan sebagai sebuah negara yang menyokong negara Islam Indonesia yang bergerak di Aceh itu. Fitnah yang serupa ini perlu menjadi perhatian kerajaan-kerajaan di Singapura dan Tanah Melayu supaya jangan lagi segala sesuatu itu dijadikan fitnah sedangkan di dalam fitnah itu mereka sendiri mengetahui menghantar wakil dan menyambut, pada hal sepanjang yang kita ketahui kerajaan Singapura tidak mengadakan sambutan sebagaimana

yang diadakan oleh Konsul Indonesia di Pulau Pinang itu. Bukti yang nyata dan terang dapat dilihat pada gambar itu dan sekarang kita mahu bertanya: Apa kata kerajaan Indonesia dalam hal ini?

Menyambut Persidangan “PAS”

Persatuan Islam se-Malaya telah berjaya melancarkan sidangnya di Kuala Lumpur pada 23,23 dan 25 Disember yang lalu. Dalam siding ini terbentuk satu dewan pimpinan “PAS” yang baharu yang bakal bertanggungjawab kepada ahli “PAS” khasnya dan umat Islam amnya dalam menyampaikan cita-cita dan tujuan umat Islam di Semenanjung Tanah Melayu ini menghadapi perubahan-perubahan yang akan berlaku pada masa yang akan datang. Darah baru dan jiwa baru yang dimasukkan dalam “PAS” ini diharap akan dapat bergerak dengan jihadnya untuk menegakkan hukum Tuhan, untuk meninggikan kalimah Tuhan di negeri ini dengan mengharap bantuan dan pertolongan Tuhan untuk menjayakannya. Janganlah hendaknya pemimpin-pemimpin “PAS” gentar kerana kecil, kecil tidak bermakna kekalahan tetapi kecil akan mendapat kemenangan apabila Tuhan akan menolong kita bersama.

Janganlah hendak pemimpin “PAS” yang akan datang ini berpendirian tidak tegas, tidak tegas menyatakan pendiriannya kepada pengertian-pengertian musuh-musuh Islam atau orang kafir. Ia hendaklah menunjukkan ketegasan-ketegasan supaya umat mengetahui dan yakin bahawa mereka berjuang bukan kerana merebut kemuliaan, bukan kerana merebut kedudukan tetapi perjuangan mereka semata-mata untuk meninggikan syiar agama untuk menegakkan hukum Tuhan di mana

berada. Dengan keyakinan itu kita percaya perjuangan kita, perjuangan Islam itu akan berdiri dengan ikhlas, akan dijalankan dengan suci hati kerana tidak berharap kepada sesuatu pun. Tegas dan pertahankanlah pendirian Islam sekalipun dicela oleh manusia. Tetapi kalau Tuhan tidak mencela maka perjuangkanlah. Janganlah diperdulikan apa hendak dinista manusia apa yang akan dicela, apa yang akan dihamun. Serahkan orang pada kita asalkan sahaja perjuangan kita itu menegakkan dan meningkatkan kalimah Tuhan yang diwajibkan kepada umat Islam untuk melaksanakan.

Untuk melaksanakan tujuan-tujuan yang tersebut mustahak benar pemimpin-pemimpin “PAS” sekarang menumpukan perhatiannya kepada “kerja dalam” ertiinya menyusun barisan Islam dengan sepenuh tenaga dengan menjauhkan daripada mengambil peduli hal orang-orang lain seperti yang tercantum di dalam ucapan Yang Dipertua “PAS” yang baru,

Borang Langanan “Qalam”

Tolong masukkan saya sebagai pelanggan Majalah “Qalam” selama..... bulan, dan bersama ini saya sertakan wang sebanyak \$..... termasuk belanja pos.

Haribulan.....

Tanda Tangan

.....